

## NACRT

Na osnovu člana 4. i 63. Zakona o komunalnim djelatnostima („Službeni glasnik Unsko-sanskog kantona“ broj: 4/11, 11/11, 6/12, 13/12, 8/15 i 14/17) i člana 23. Statuta Općine Ključ prečišćen tekst („Službeni glasnik Općine Ključ“ broj: 3/10 i 3/11), Općinsko Vijeće Općine Ključ, na svojoj \_\_\_\_\_ redovnoj sjednici, održanoj dana \_\_\_\_\_ 2021. godine, donijelo je

## O D L U K U o grobljima – mezarjima na području općine Ključ

### I OSNOVNE ODREDBE

#### Član 1.

Ovom Odlukom se definišu način i uslovi uređivanja i održavanja grobalja – mezarja u upotrebi, uslovi za ustupanje i naknadu za korištenje grobnih – mezarjih mjesta, uslovi za podizanje grobnica, uslovi za postavljanje nadgrobnih spomenika – mezarjih nišana i upisa određenih podataka na tim spomenicima, prenos posmrtnih ostataka do groblja – mezarja i uslove kada se sahranjivanje može vršiti van groblja – mezarja u upotrebi, postupak odobravanja postavljanja, uklanjanja, odnosno zamjenu nadgrobnih spomenika – mezarjih nišana i nadgrobnih znakova, izgradnja i korištenje mrtvačnica, izgradnja, korištenje i upravljanje objektima za vršenje vjerskih obreda, kao i ostala pitanja od značaja za predmetnu problematiku.

#### Član 2.

Pojedini termini u ovoj Odluci imaju značenje kako slijedi:

*a)* Groblje – mezarje je komunalni objekat namijenjen za sahranu umrlih, opremljen potrebnim komunalnim objektima i infrastrukturom, na kojem je ukopano više od 5 umrlih, koji je evidentiran u katastarskim evidencijama te posjeduje odgovarajuća akta o građenju, u skladu sa odredbama ove Odluke. Sastavnim dijelom groblja – mezarja se pored zemljišta koje se odredi za ukop i sahranjivanje, smatraju i prateći objekti i uređaji koji su izgrađeni na groblju – mezarju i služe za ukop i sahranjivanje i korištenje groblja – mezarja.

*b)* Gradskim grobljem – mezarjem u smislu ove Odluke smatra se groblje – mezarje, koje kao takvo proglasi Općinsko vijeće Općine Ključ.

*c)* Grobnim – mezarim mjestom, odnosno porodičnom grobnicom – mezarom smatra se geometrijski omeđeno ili na drugi način obilježeno, odnosno po odgovarajućim građevinskim normama izgrađeno zemljište pogodno za ukop i sahranjivanje posmrtnih ostataka.

*d)* Porodičnim grobljem – mezarjem smatra se registrovano groblje – mezarje u kojem se vrši ukop pripadnika jedne ili više porodica i koje nije pod upravom vjerske zajednice ili nekog drugog pojedinačnog subjekta.

*e)* Obavezno počivanje je period koji mora proteći od dana sahrane da bi se mogla vršiti promjena namjene zemljišta na kojem je groblje izgrađeno ili izvršiti premještanje posmrtnih ostataka iz jednog grobnog mjesta u drugo.

*f)* Pogrebna djelatnost obuhvata radnje u vezi sa ukopom i sahranjivanjem umrlih i radnje u vezi sa ukopom i sahranjivanjem posmrtnih ostataka.

#### Član 3.

Ukop umrlih vrši se na grobljima – mezarjima kojim upravljaju vjerske zajednice, na gradskom groblju – mezarju ili na porodičnim grobljima – mezarjima.

#### Član 4.

Zabranjeno je vršenje ukopa van groblja – mezarja iz člana 3. Odluke.

Za umrle koji budu ukopani van groblja – mezarja, rješenjem nadležnog inspektora odrediće se ekshumacija, odnosno izmještanje na lokaciju koja ima status groblja, sve o trošku porodice, odnosno lica koje je bilo dužno da se stara o izdržavanju umrlog.

#### Član 5.

Uređivanje, održavanje i upravljanje grobljima – mezarjima tipa gradsko groblje – mezarje, povjeriće se komunalnom preduzeću ili drugom pravnom licu, koje ispunjava uvjete minimalne tehničke i

stručne osposobljenosti za obavljanje pogrebne djelatnosti, u skladu s posebnim propisima.

Grobljima – mezarjima koji su u vlasništvu vjerskih zajednice upravlja vjerska zajednica u skladu sa Zakonom, internim propisima i ovom Odlukom.

O porodičnim grobljima – mezarjima, dužna se starati, uređivati i održavati ih porodica lica koja su u istim ukopana, uz koordinaciju mjesne zajednice.

#### **Član 6.**

Za izgradnju, odnosno legalizaciju groblja – mezarja pribavljaju se akta o građenju, u skladu sa posebnim propisima.

Groblja izgrađena prije aero-foto snimanja prije 1981/82.godine se ne smatraju bespravnim, dok je za groblja izgrađena, odnosno proširena poslije tog vremena, koja ne posjeduju akte o građenju, potrebno provesti postupak legalizacije kod Službe nadležne za poslove prostornog uređenja.

Sva groblja – mezarja, bez obzira na vrstu i upravitelja, moraju biti ograđena i održavana u urednom i čistom stanju. Vrstu ograde za pojedina groblja – mezarja određuje nadležna Služba Općine Ključ, u skladu sa zakonskim propisima.

Pristupni putevi do groblja – mezarja moraju biti izgrađeni pod uslovima utvrđenim Zakonom o cestama i Odlukom o lokalnim i nekategorisanim cestama, odgovarajuće širine kolovoza, koja ne smije biti manja od 3 metra.

Pristupni putevi u katastarskim – zemljišno-knjižnim evidencijama moraju biti upisani kao javno dobro, odnosno na istim moraju biti riješeni imovinsko-pravni odnosi u smislu propisa iz oblasti prostornog uređenja i građenja.

#### **Član 7.**

Gradska groblja – mezarja i groblja – mezarja mogu imati izgrađene mrtvačnice, ukoliko postoje uslovi za njihovu izgradnju.

Do izrade mrtvačnice posmrtni ostaci čuvaju se u posebno određenoj i uređenoj prostoriji za čuvanje mrtvaca, koja ispunjava savremene sanitarne uvjete.

#### **Član 8.**

Na grobljima – mezarjima se mogu graditi samo objekti i uređaji potrebni za radnje ukopa – sahranjivanja posmrtnih ostataka, uređivanje i održavanje groblja – mezarja.

#### **Član 9.**

Na grobljima – mezarjima se mora predvidjeti i higijenski urediti poseban prostor za smještaj otpadaka, spaljivanje vijenaca i slično, o čemu se stara upravitelj.

#### **Član 10.**

Pravno lice koji obavlja radnje uređivanja, održavanja i upravljanja grobljima – mezarjima, dužan je da:

- obezbijedi uslove za ukop – sahranjivanje posmrtnih ostataka,
- formira, odnosno obezbijedi pogrebnu službu za održavanje i staranje o groblju – mezarju,
- uredno vrši održavanje i uređivanje groblja – mezarja,
- propiše režim rada, kao i druge uslove upravljanja i održavanja groblja – mezarja iz člana 1. ove Odluke, u skladu sa Zakonom i ovom Odlukom, uz prethodnu saglasnost Općinskog vijeća Općine Ključ,
- vrši i druge poslove određene Zakonom, internim propisima i ovom Odlukom.

Općinsko vijeće će donijeti posebnu Odluku kojom će definisati dužnosti i poslove upravitelja.

#### **Član 11.**

Za grobno – mezarno mjesto u gradskom groblju, odnosno parcelu plaća se naknada koja će se koristiti za proširenje i dogradnju te izgradnju infrastrukture gradskog groblja – mezarja u skladu sa usvojenim Regulacionim planom.

Pored naknade iz prethodnog stava ovog člana i u svrhu održavanja, čišćenja i čuvanja groblja – mezarja, grobnih i mezarnih mjesta plaća se za grob – mezar ili za porodičnu grobnicu, posebna godišnja naknada.

Općinsko vijeće Općine Ključ propisuje jedinicu mjere i način formiranja visine naknade.

## **II OBAVLJANJE UKOPA I ODRŽAVANJE GROBLJA – MEZARJA**

### **Član 12.**

Ukop i sahranjivanje umrlih po pravilu se vrši u redove. Između svaka dva reda grobova – mezara mora se nalaziti slobodan prostor – put širine najmanje 1 metar, a razmak između grobnih – mezarneih mjesta ne smije biti manji od 0,5 metara u skladu sa važećim Regulacionim planom.

Dubina groba – mezara treba da iznosi najmanje 1,80 metara tj. do gornjeg ruba mrtvačkog sanduka najmanje 1,20 metara, odnosno ista se određuje u skladu s vjerskim propisima.

Kopanje i zatrpavanje grobova – mezara vrši preduzeće koje upravlja grobljem – mezarjem, odnosno posebna određena lica – grobari. Ova lica vrše i prenos umrlog do groba – mezara, ukoliko to ne vrše srodnici ili drugi građani.

Za obavljanje usluga iz prethodnog stava, preduzeće koje upravlja grobljem – mezarjem naplaćuje naknadu utvrđenu u skladu sa članom 11. ove Odluke.

### **Član 13.**

Poslovi iz člana 12. stav 2. u grobljima – mezarjima koji su u vlasništvu vjerskih zajednica i grobljima – mezarjima u ostalim naseljima kojima upravlja porodica, obavljaju se na osnovu dogovora sa vjerskim, odnosno mjesnim zajednicama, poštujući interne propise, sve u skladu sa odredbama ove Odluke.

### **Član 14.**

Pravno lice koje upravlja grobljem – mezarjem, odnosno preduzeće koje se bavi pogrebnom djelatnošću, dužno je da ima posebno vozilo namijenjeno za prevoz posmrtnih ostataka – umrlog do groblja - mezarja, u skladu s posebnim propisima.

### **Član 15.**

Svaki grob – mezar se mora obilježiti prikladnim nadgrobnim – mezarneim oznakama ili spomenicima - nišanima. Postavljanje nadgrobnih spomenika – mezarneih nišana i upis određenih podataka na tim spomenicima mora biti u skladu sa ovom Odlukom.

O obliku i materijalu nadgrobnih spomenika – mezarneih nišana odlučuje upravitelj.

### **Član 16.**

Groblja – mezarja koja imaju karakter porodičnih grobalja – mezarja, podliježu obavezi uređivanja i održavanja u skladu sa odredbama ove Odluke.

O uređivanju i održavanju grobalja – mezarja iz prethodnog stava dužna su se starati lica koja su izgradila groblja – mezarja, odnosno čiji su članovi porodice ukopani na istima.

Ako lica iz prethodnog stava ne vrše, odnosno ne obezbjeđuju održavanje i uređivanje grobova – mezara, mjesna zajednica na čijoj teritoriji se groblje – mezarje nalazi upozorit će ta lica na njihovu obavezu te ostaviti rok, ne duži od 30 dana za uređenje groblja – mezarja.

Ako se ni u datom roku ne uredi groblje – mezarje, mjesna zajednica će obavijestiti Službu nadležnu za inspeksijske poslove, koja će naložiti uređenje, odnosno održavanje groblja – mezarja putem subjekta koji za to ispunjava uslove, a na trošak lica iz stava 2.

### **Član 17.**

Pravno lice koje upravlja grobljem – mezarjem određuje vrijeme u koje je dozvoljen pristup na groblje – mezarje. Prisutni prilikom ukopa – sahrane, kao i posjetioci na groblju – mezarju moraju se ponašati kako to odgovara pijetetu prema mrtvim.

### **Član 18.**

Na grobovima – mezarima, odnosno nadgrobnim spomenicima – mezarneim nišanima, zabranjeno je ispisivanje natpisa koji vrijeđaju bilo čiji nacionalni ili vjerski osjećaj, pietet prema umrlim ili koji mogu izazvati uznemirenje građana.

Postavljanje nadgrobnih spomenika – mezarneih nišana i upisa određenih podataka podliježe prethodnom odobrenju pravnog lica koje upravlja grobljem – mezarjem, odnosno prethodnom odobrenju drugog upravitelja, koji je obavezan ukloniti nadgrobni spomenik– mezarne nišan ili natpis, ako isti ne odgovara uslovima iz prethodnog stava.

#### **Član 19.**

Na grobljima – mezarjima se mogu saditi sve vrste ukrasnog bilja i grmlja vodeći pri tom računa da ono svojim razvojem ne oštećuje susjedne grobove mezare, odnosno grobnice.

#### **Član 20.**

Ako prilikom ukopa – sahrane nastane oštećenje okolnih grobova – mezara ili grobnica, lice odgovorno za oštećenje je dužno isto sanirati i grobove – mezare dovesti u prvobitno stanje, u roku od 10 dana od dana oštećenja.

Ako lice iz prethodnog stava ovog člana ne postupi prema odredbama ovog člana, preduzeće koje upravlja grobljem – mezarjem, učiniće to na njegov trošak.

#### **Član 21.**

Postavljanje, uklanjanje, odnosno zamjena nadgrobnih spomenika – mezarjih nišana i sličnih predmeta može se izvršiti samo na osnovu odobrenja preduzeća, odnosno vjerske ili mjesne zajednice, ovisno o vrsti groblja – mezarja.

#### **Član 22.**

Za uređenje i održavanje groblja – mezarja i pojedinih spomenika koji su pod zaštitom države (nacionalni i drugi zaštićeni spomenici) primjenjuju se posebni propisi.

Spomenici iz Drugog svjetskog rata, zajedno sa spomenicima iz ranijih vremena, uživaju posebnu zaštitu na teritoriji općine Ključ.

Grobovi i grobnice u kojima su sahranjeni posmrtni ostaci značajnih historijskih ličnosti ne mogu se smatrati napuštenim, već se o njima brine nadležni organ jedinice lokalne samouprave, u skladu sa posebnim propisima.

#### **Član 23.**

Sahrana se vrši u skladu sa odgovarajućim sanitarnim propisima, a na način koji odgovara poštovanju prema umrlom, dostojanstvu mjesta na kojem počiva i uz poštovanje osjećanja srodnika umrlog i drugih lica koja su bila bliska sa umrlim.

Prilikom sahrane mogu se vršiti vjerski obredi u skladu sa propisima o pravnom položaju vjerskih zajednica.

#### **Član 24.**

Sahrana umrlih može se vršiti samo na groblju – mezarju, koje je registrovano u katastru groblja – mezarja i koje posjeduje odgovarajuća akta o građenju te izuzetno na grobljima – mezarjima za koje je pokrenut postupak njihove legalizacije.

Umrli se po pravilu sahranjuje na groblju – mezarju koje se nalazi na području jedinice lokalne samouprave gdje je imao prebivalište.

Umrli se može sahraniti i na groblju – mezarju koje je on odredio za života ili koje odredi njegova porodica, odnosno lica koja su dužna da se brinu o njegovoj sahrani.

#### **Član 25.**

O ukopu – sahrani se stara i troškove snosi lice koje je prema odgovarajućim propisima, bilo dužno da umrlog za života izdržava, odnosno da se o njemu stara ili lica koja su po odgovarajućim propisima dužna da se o tome staraju.

Ako ne postoji lice iz prethodnog stava ili ono nije u mogućnosti obezbijediti ukop – sahranjivanje, isto će izvršiti pravno lice, odnosno vjerska ili mjesna zajednica koja upravlja grobljem – mezarjem, u mjestu gdje je lice umrlo, odnosno gdje su posmrtni ostaci nađeni.

U slučaju iz stava 2. ovog člana, troškove ukopa – sahrane snosi Općina na čijem je području umrli imao posljednje prebivalište, a ako se ne može utvrditi općina posljednjeg prebivališta, troškove ukopa – sahrane snosi Općina Ključ, ako je lice umrlo na području općine, za što se obezbjeđuju sredstva u budžetu Općine.

#### **Član 26.**

U vjerskim i mjesnim zajednicama obavezno se moraju formirati odbori koji će upravljati i održavati

grobља – mezarja, kao i vršiti organizaciju ukopa – sahranjivanja u grobljima – mezarjima kojima upravlja vjerska odnosno mjesna zajednica.

Sve radnje oko uređivanja, održavanja i upravljanja grobljima – mezarjima u vjerskim i mjesnim zajednicama regulisat će se posebnom odlukom koja će važiti za područje vjerske odnosno mjesne zajednice, a mora biti u skladu sa Zakonom i ovom Odlukom.

#### **Član 27.**

Prevoz i prenos umrlog u mrtvačnicu vrši se u mrtvačkom sanduku, odnosno na nosilama koja su za to posebno pravljena i koja se samo u tu svrhu koriste.

Prevoz i prenos iz mrtvačnice na mjesto ukopa može se izvršiti i bez nosila tako da rodbina i prijatelji nose umrlog, u skladu sa običajima.

#### **Član 28.**

Umrli se ukopava – sahranjuje u sanduku ili umotan u platno, zavisno od želje umrlog ili rodbine, odnosno u skladu sa tradicijom i vjerskim opredjeljenjem.

Ukop – sahrana umrlog u sanduku je obavezna ako je lice umrlo od zarazne bolesti. Sanduk (ukoliko se ukop vrši u sanduku) mora biti od drveta ili odgovarajućeg metala. U tom slučaju se strogo moraju poštovati propisi koji uređuju zaštitu stanovništva od zaraznih bolesti.

#### **Član 29.**

Ukop – sahrana posmrtnih ostataka umrlog vrši se u pravilu nakon isteka 24 sati od momenta kada ovlašteni mrtvozornik konstatuje nastupanje smrti, a prije isteka 48 sati od momenta nastupanja smrti.

Izuzetno, uz odobrenje nadležnog inspektora ukop – sahrana posmrtnih ostataka, može se iz sanitarnih razloga izvršiti i prije ili poslije isteka roka iz prethodnog stava.

#### **Član 30.**

Na dan ukopa – sahrane rodbina umrlog može specijalnim vozilom ovlaštenog preduzeća registriranog za bavljenje pogrebnom djelatnošću, izvršiti prevoz posmrtnih ostataka umrlog iz mrtvačnice direktno u vjerski objekat (džamiju ili crkvu) bez formiranja povorke radi obavljanja vjerskog obreda.

#### **Član 31.**

Na groblju – mezarju se mogu vršiti vjerski obredi koji važe i koji se primjenjuju uz nacionalnu i vjersku pripadnost umrlog u skladu sa Zakonom o slobodi vjere, pravnom položaju crkava i vjerskih zajednica u Bosni i Hercegovini.

#### **Član 32.**

Nakon završetka pogrebnog obreda pred mrtvačnicom, odnosno vjerskog obreda pred vjerskim objektom (džamijom ili crkvom), formira se pogrebna povorka i posmrtni ostaci se prenose do groblja – mezarja.

#### **Član 33.**

Čim se posmrtni ostaci spuste u grob – mezar, grob - mezar se mora zasuti zemljom, odnosno grobnica zatvoriti.

### **III ZAŠTITA GROBLJA – MEZARJA**

#### **Član 34.**

Pravno lice, odnosno vjerska zajednica ili porodica koja upravlja grobljima – mezarjima na teritoriji općine Ključ dužni su na odgovarajući način obezbijediti nadzor i zaštitu groblja – mezarja.

#### **Član 35.**

Na groblju – mezarju u cilju njegove zaštite zabranjuju se sljedeće aktivnosti:

1. uništavanje nadgrobničkih spomenika – mezarinih nišana, ograde, vijenaca, cvijeća, ukrasnog bilja i drugih uređaja koji služe pijetetu umrlih,
2. gaženje grobova – mezara i nasada,
3. šaranje po spomenicima, ogradama i drugim objektima na groblju – mezarju, ispisivanje riječi koje vrijeđaju bilo čiji nacionalni, vjerski osjećaj ili pijetet prema umrlim,
4. bacanje uvelih vijenaca, cvijeća i drugih otpadaka van mjesta koje je za to posebno određeno,
5. ostavljanje hrane na grobovima – mezarima,

6. svaki oblik trgovine,
7. prosjačenje,
8. obavljanje fotografisanja u vidu zanata,
9. dovođenje pasa i drugih životinja kao i njihovo napasanje,
10. lov,
11. voženje svim prevoznim sredstvima, osim invalidskim kolicima i vozilima koja se koriste pri ukopu – sahrani, odnosno prilikom popravke, uređenja i održavanja groblja – mezarja,
12. reklama i propaganda u bilo kom obliku,
13. pjevanje i muzika, osim one koju nalaže obavljanje pogrebne djelatnosti,
14. zasađivanje voća i povrća,
15. ulaženje u mrtvačnicu bez odobrenja upravitelja, odnosno odgovornog lica,
16. svaki drugi postupak ili radnja kojom se oskrnavljuje nadgrobni spomenik, grob – mezar ili groblje – mezarje.

#### **Član 36.**

Za vršenje zanatskih radova i usluga na grobljima - mezarjima važe pored ostalih propisa još i slijedeće odredbe:

1. Pravno lice odnosno vjerska ili mjesna zajednica može u određene dane i u određeno doba da zabrani izvođenje zanatskih radova na grobljima – mezarjima ili na pojedinim dijelovima groblja – mezarja,
2. Radovi na groblju – mezarju treba da se izvode tako da se do najveće mjere očuva mir i dostojanstvo groblja – mezarja. Radovi se u radne dane mogu vršiti do 18 sati.
3. Građevinski materijal (kamen, građa, pijesak i drugo) može se držati na groblju – mezarju samo u potrebnoj količini i za vrijeme vršenja radova, tako da se time ne ometa saobraćaj na groblju – mezarju. U slučaju prekida radova izvođač je dužan da radilište bez odlaganja dovede u prvobitno stanje o svom trošku.
4. Pronađeni dijelovi sanduka ili ostaci kostiju koji budu pronađeni prilikom izvođenja radova predaju se pravnom licu, vjerskoj ili mjesnoj zajednici koja upravlja grobljem – mezarjem.

Izvođaču radova koji se ne pridržava odredaba ove Odluke kod izvođenja radova, zabranit će se rad na groblju – mezarju.

### **IV ZATVARANJE GROBLJA – MEZARJA I EKSHUMACIJA**

#### **Član 37.**

Iskopavanje i prenos posmrtnih ostataka (ekshumacija) iz groblja – mezarja na području općine Ključ iz jednog u neko drugo mjesto na području općine odnosno van područja općine Ključ vrši se na zahtjev rodbine umrlog te po naredbi sudskih organa.

#### **Član 38.**

Ako je uzrok smrti umrlog bila zarazna bolest, iskopavanje i prenos posmrtnih ostataka ne može se vršiti prije isteka roka od 1 godine od dana ukopa – sahrane. Postupak oko iskopavanja i prenosa posmrtnih ostataka provodi se u skladu sa odredbama propisa o zaštiti stanovnika od zaraznih bolesti.

#### **Član 39.**

Općinsko vijeće donijeće odluku o zatvaranju groblja – mezarja gradskog tipa, kada utvrdi da na groblju više nema mogućnosti osnivanja novih grobnih mjesta, uz mogućnost ukopa u postojeća rezervisana grobna mjesta.

Općinsko vijeće donijeće odluku o stavljanju groblja ili dijela groblja – mezarja van upotrebe kada više ne postoji mogućnost ukopa zbog prostornih, sanitarnih i drugih uslova.

Ovlašteni predlagači predložiće donošenje odluka iz stava 1. i 2. na temelju izvještaja nadležne inspekcije.

#### **Član 40.**

Prostor groblja – mezarja stavljenog van upotrebe, ili njegov dio, može se koristiti za druge namjene određene odgovarajućim dokumentom prostornog uređenja poslije isteka roka obaveznog počivanja.

#### **Član 41.**

Po isteku roka iz člana 40. groblje – mezarje ili njegov dio van upotrebe može se izmjestiti i izvršiti prenamjena prostora, u skladu sa dokumentima prostornog uređenja.

Općinsko vijeće donosi odluku o izmještanju groblja – mezarja ili dijela groblja – mezarja koje je van upotrebe pod uslovom da se izmještanje groblja i dalje sahrane osiguraju izgradnjom novog

grobља ili na drugom postojećem groblju na području općine.

Troškove izmještanja grobља ili dijela grobља i uređenje grobnih mjesta iz stava 1. ovog člana snosi Općina, odnosno subjekat koji ima interes ili obavezu da se izvrši izmještanje.

#### **Član 42.**

Odluku o izmještanju grobља – mezarja ili njegovog dijela van upotrebe objavljuje se, pored objave u „Službenom glasniku Općine Ključ“, i na oglasnoj tabli te internet stranici Općine te u lokalnim sredstvima javnog informisanja.

Pored Odluke, u „Službenom glasniku Općine Ključ“, u sredstvima javnog informisanja objavljuje se i saopštenje, koje sadrži podatke o groblju – mezarju koje se izmješta, podatke o groblju – mezarju na koje će se izvršiti prenos ekshumiranih posmrtnih ostataka, kao i poziv srodnicima lica sahranjenih na groblju – mezarju koje je određeno za izmještanje da u roku od tri mjeseca od objavljivanja saopštenja dostave svoje zahtjeve u pogledu načina ponovnog ukopavanja ekshumiranih posmrtnih ostataka njihovih srodnika i preuzimanja nadgrobničkih spomenika – mezarinih nišana i drugih predmeta u vezi sa grobovima – mezarima ili grobnicama.

Po isteku roka iz stava 2. ovog člana srodnici, o svom trošku, mogu premjestiti posmrtne ostatke i sahraniti ih na drugom groblju u upotrebi, kao i ukloniti nadgrobne spomenike i druge predmete sa grobova i grobnica.

Ekshumacija posmrtnih ostataka ne može se vršiti prije isteka roka iz stava 2. ovog člana, a ekshumirani ostaci za koje ne budu dostavljeni zahtjevi da se ukopaju na uobičajeni način pokopavaju se u za to određen zajednički grob, odnosno grobnicu, na koje se stavljaju podaci o licima čiju su posmrtni ostaci tu pokopani.

Spomenici – nišana i drugi predmeti koji do početka ekshumacije posmrtnih ostataka ne budu uklonjeni, pripadaju subjektima koji upravljaju grobljem i oni sa njima slobodno raspoložu.

#### **Član 43.**

Izuzetno, kada je to neophodno iz urbanističkih i drugih opravdanih razloga, Općinsko vijeće Općine Ključ može donijeti odluku o izmještanju grobља – mezarja ili dijela grobља – mezarja van upotrebe i prije isteka roka obaveznog počivanja, ali ne prije isteka roka od deset godina, ako je zemljište isušeno, odnosno roka od 20 godina, ako je zemljište vlažno, računajući od dana obavljene posljednje sahrane.

Postupak objavljivanja odluke i prenosa ekshumiranih ostataka vrši se u skladu sa odredbama člana 42. ove Odluke.

U slučaju iz stava 1. ovog člana, jedinica lokalne samouprave dužna je da bez naknade obezbijedi vlasniku grobnog mjesta za koje još nije istekao rok obaveznog počivanja drugo grobno – mezarino mjesto u istom ili drugom groblju – mezarju istih ili približno istih lokacijskih uslova.

#### **Član 44.**

Ukoliko se radi o groblju – mezarju ili grobovima – mezarima lociranim u obuhvatu gradskog i ostalog građevinskog zemljišta, odnosno u obuhvatu sadašnjih i ranije donesenih planskih dokumenata, Općinsko vijeće može na zahtjev subjekta koji ima pravni interes, nakon proteka 10 godina od posljednjeg ukopa, donijeti odluku o izmještanju grobља – mezarja ili dijela istog, kao i grobova – mezara, a u svrhu izgradnje građevina.

Sve troškove oko izmještanja iz stava 1. ovog člana snosi podnosilac zahtjeva za izmještanje.

Mjesto na koje će biti izmješteno groblje – mezarje ili grobovi – mezari, određuje upravitelj.

Ukoliko se upravitelj ne očituje pismeno u roku od 15 dana od primljenog zahtjeva za očitovanje, izmještanje se vrši na gradsko groblje – mezarje.

Iskopi i ukop vrši komunalno preduzeće ili drugo pravno lice koje upravlja grobljima - mezarjima.

#### **Član 45.**

Nova grobља grade se na pogodnom i dovoljno velikom prostoru koji je prema ambijentu i konfiguraciji terena odgovarajući za tu namjenu, izvan ili na rubu naseljenog mjesta, sa obezbijeđenim pristupom na javne saobraćajnice, sve u skladu sa prostorno-planskom dokumentacijom.

### **V KAZNENE ODREDBE**

#### **Član 46.**

Novčanom kaznom od 500,00 do 3.000,00 KM kazniće se za prekršaj pravno lice ili vjerska zajednica koja upravlja grobljem – mezarjem:

1. ako ne obezbijedi uslove za ukop – sahranu i ako ne vrši uređivanje i održavanje grobља – mezarja,
2. ako da odobrenje za postavljanje, uklanjanje, odnosno zamjenu nadgrobničkih spomenika i nadgrobničkih

znakova suprotno odredbama ove Odluke,

3. ako izvrši ukop – sahranjivanje u groblju – mezarju van upotrebe suprotno odredbama ove Odluke,

4. ako onemogući ukop – sahranu posmrtnih ostataka u groblju – mezarju u upotrebi odnosno u dijelu groblja – mezarja u upotrebi, kao i na način koji odredi lice koje se stara o ukopu – sahrani, ako se umrli za života nije izjasnio o načinu i mjestu ukopa – sahranjivanja,

5. ako ne izvrši ukop – sahranjivanje u slučaju da ne postoje lica koja se staraju o ukopu – sahrani,

6. ako ne ukloni spomenik – nišan izgrađen i postavljen protivno propisima,

7. ako ne ogradi groblje – mezarje,

8. ako prekrši zabrane iz člana 35. ove Odluke.

Za prekršaje iz tačke 3, 4. i 8. prethodnog stava kaznit će se pravno lice koje se bavi pogrebnom djelatnošću.

Za prekršaje iz stava 1. ovog člana članovi porodice koji upravljaju porodičnim grobljem – mezarjem kazniće se novčanom kaznom od od 500,00 do 2.000,00 KM.

Novčanom kaznom od 300,00 do 1.500,00 KM za prekršaj iz stava 1. ovog člana kazniće se odgovorno lice upravitelja, vjerske i mjesne zajednice.

#### **Član 47.**

Novčanom kaznom od 150,00 do 500,00 KM kazniće se za prekršaj fizičko lice:

1. ako bez odobrenja vrši postavljanje, uklanjanje, odnosno zamjenu nadgrobnih spomenika – mezarjih nišana i nadgrobnih znakova,

2. ako vrši ukop – sahranjivanje u groblju – mezarju van upotrebe i u upotrebi bez odobrenja nadležne službe Općinskog organa uprave,

3. ako u gradu i naseljenim mjestima gdje za to postoje mogućnosti posmrtnih ostatke do ukopa – sahrane ne čuva u mrtvačnici, odnosno u posebno određenoj i uređenoj prostoriji za čuvanje mrtvaca,

4. ako se ne stara o ukopu umrlog, a bio je dužan da ga za života izdržava,

5. ako prekrši zabrane iz člana 35. ove Odluke.

Za prekršaje iz tačke 1, 2, 3. i 5. prethodnog stava kazniće se preduzeće koje obavlja pogrebnju djelatnost u iznosu od 300,00 do 1.500,00 KM kao i fizičko lice koje obavlja obrtničku djelatnost.

## **VI PRELAZNE I ZAVRŠNE ODREDBE**

#### **Član 48.**

U roku od mjesec dana od dana stupanja na snagu ove Odluke, nadležna služba Općinskog organa uprave u saradnji sa pravnim licem kojem se povjerava upravljanje odnosno vjerskim ili mjesnim zajednicama koje upravljaju grobljima – mezarjima, otpočeće sa uspostavom katastra groblja - mezarja.

Katastar groblja – mezarja, pored elemenata propisanih posebnim propisima, naročito sadrži katastarske podatke o parceli, površini, katastarskoj općini kao i području grada, mjesne zajednice i ostalog područja na kojem se groblje – mezarje nalazi, da li je u upotrebi ili van upotrebe, odnosno koja bi se mogla koristiti za druge namjene.

#### **Član 49.**

Pravna lice, vjerske ili mjesne zajednice dužni su izvršiti ograđivanje groblja - mezarja, uz prethodno pribavljanje akata o građenju ograde.

U roku iz stava 1. upravitelji su obavezni pribaviti akta o građenju (legalizaciji) za bespravno izgrađena groblja.

#### **Član 50.**

Nadzor nad provođenjem odredaba ove Odluke vršit će općinski organ uprave Ključ odnosno nadležna općinska Služba.

Inspekcijski nadzor nad obavljanjem pogrebnih djelatnosti, kao i provođenjem ove Odluke vrši komunalna, sanitarna i urbanističko – građevinska inspekcija, svaka u okvirima svoje nadležnosti.

Komunalnom inspektor u vršenju inspekcijskog nadzora nad provođenjem ove Odluke pomažu komunalni redari.



**Član 52.**

Odluke i propise kojima će se pobliže urediti pojedine oblasti iz ove Odluke, Općinsko vijeće općine Ključ dužno je uskladiti i donijeti u roku od 6 mjeseci od dana stupanja na snagu ove Odluke.

**Član 53.**

Danom stupanja na snagu ove Odluke prestaje važiti Odluka o upravljanju, uređivanju i održavanju mezarja i grobalja na području općine Ključ („Službeni glasnik općine Ključ“ broj: 5/11).

**Član 54.**

Ova Odluka stupa na snagu osmog dana nakon objavljivanja u „Službenom glasniku Općine Ključ“.

Broj : \_\_\_\_\_ /21  
Ključ, \_\_\_\_\_ 2021.godine

PREDSJEDAVAJUĆA  
OPĆINSKOG VIJEĆA

Emina Velić, prof.

## OBRAZLOŽENJE

### Odluke o grobljima – mezarjima na području Općine Ključ

#### PRAVNI OSNOV:

Pravni osnov za donošenje ove Odluke, sadržan je u članu 4, 58. i 63. Zakona o komunalnim djelatnostima („Službeni glasnik Unsko-sanskog-kantona“ broj: 4/11, 11/11, 6/12, 13/12, 8/15 i 14/17) gdje je propisano da djelatnost obavljanje pogrebnih poslova i održavanje spomen obilježja, stratišta, mezaristana i grobalja – mezarja kulturno-istorijskog značaja spada u djelatnosti individualne komunalne potrošnje i zajedničke komunalne potrošnje, da je od javnog interesa, da se obavljaju kao javne službe te da se predmetne djelatnosti regulišu posebnom općinskom odlukom.

Sredstva od naplate za grobno – mezarna mjesta bit će upotrijebljena za otkup zemljišta u cilju dogradnje, proširenja i konačnog uređenja i opremanja prostora gradskog groblja – mezarja sa priključnom saobraćajnicom kao i ostalom komunalnom infrastrukturom u skladu sa usvojenim Regulacionim planom „Gradsko groblje – mezarje Huskići Ključ“.

#### RAZLOZI ZA DONOŠENJE:

U skladu sa gore citiranim zakonskim odredbama propisana je obaveza Općine da svojom odlukom propiše odredbe o obavljanju pogrebne djelatnosti – upravljanje, ustupanje, održavanje i uređivanju grobljima – mezarjima na području općine Ključ.

Na osnovu gore navedenog, predlažemo Općinskom vijeću općine Ključ da odluku u predloženom tekstu usvoji.

Služba za prostorno uređenje stambeno-komunalne,  
imovinsko-pravne i geodetske poslove